

NESTRI SIGNÔR GJESÙ CRIST RE DAL MONT INTÎR

Jutoris pe Liturgjie

Domenie, ai 26 di Novembar dal 2017

Cun cheste solenitât si conclût l'an liturgjic de glesie. In ogni tape de vite e reste la memorie di ce che al è stât intant che al comence un avignî che dome si olme, ma no si cognòs. La vite tal scori dal timp, nus puarte a la constatazion dal profete Isaie: Ogni om al è tant che jerbe e dute la sô glorie e je tant che une rose di cjamp (40, 6). Pal mont intîr tal passâ dai centenârs di miârs e milions di agns a valaran lis peraulis: Il soreli si scurissarà, la lune no darà plui la sô lûs, lis stelis a colaran jù dal cîl (Mt 24, 29). Ma in chest fruçon infinitesimal di lûc e di timp che nus è stât dât, e reste ancjemò la peraule di Gjesù: Ce i zovaraial po al om se, dopo vê cjàpât magari il mont intîr, al ruvine la sô vite? O ben ce podarajal dâ l'om sore de sô vite? (Mt 16, 26).

Al è passât un an: ce sens aial ce che al è stât, ce sens varaial ce che al vignarà? E ce vantaç i vegnial mo al om di dutis lis vitis che al fâs? (Qo 3, 9).

Ce sens ae cheste vite? E je la grande, uniche domande di ognidun.

A cheste domande e done une rispueste la messe div vuê te curnîs di Crist re dal mont intîr.

*La prime leture nus presente il judici di Diu sui sorestants e lis lôr responsabilitâts;
la seconde leture nus vise de rivincite di Crist su la muart;*

il vanzeli, cemût che la nestre vite e la storie dal mont, zornade dopo zornade a puedin cjàpâ un sens.

Intant la antifone di jentrade nus fâs cjalâ a Crist, l'Agnel ch'al è stât copât: vèr e unic judiç de storie dal mont.

Antifone di jentrade

Ap 5,12; 1,6

L'Agnel ch'al è stât copât al merte di vê potence e ricjece, sapience e fuarce e onôr: a lui la glorie e la potence tai secui dai secui.

Si dîs Glorie a Diu.

Colete

Diu onipotent e eterni,
che tu âs volût tornâ a fâ dutis lis robis
in Crist, to Fi, Re dal mont intîr,
danus la gracie
che dute la creazion, sfrancjade de sclavitût,
e servissi la tô maiestât e ti laudi cence mai finî.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Ez 34,11-12.15-17

Vualtris o sês lis mêis pioris: jo o judicarai fra piore e piore.

No dome il profete ma Diu stes al bute di bande i sorestants politics e religjôs, i studiâts e i caporions di Gjerusalem dal secul VII p.d.C.

Di fat il Signôr, gno Diu, al dîs cussî: Ve, o larai jo a cirî lis mêis pioris... O sarai jo a menâ a passon lis mêis pioris... Une scualifiche gjenerâl e cence apel des guidis, dai pastôrs di popul, dai responsabii dal moment.

Il pinsîr al va al nestri Friûl, al guviâr che o vin, al mont globalizât li che o vivin. Puedial valê ancje pai sorestants de nestre societât ce che il profete al diseve pai siei timps?

Ancje vuê il Signôr aial di escludi lis guidis di popul e tornâ a dî: Ve, o larai jo a cirî lis mêis pioris ?

Dal libri dal profete Ezechiel

Il Signôr, gno Diu, al dîs cussî: «Ve, o larai jo a cirî lis mêis pioris e lis contarai une par une. Come che il pastôr al conte lis pioris une par une, cuant che al è framieç des sôs pioris che si son dispierdudis, cussî o contarai lis mêis pioris une par une e lis menarai a salvament di ogni lûc là che si jerin sparniçadis tai dîs di fumate e di scûr. O sarai jo a menâ a passon lis mêis pioris e a regonâlis – sentence dal Signôr, gno Diu –.

Chê che si è pierdude o larai a cirîle, chê che si je slontanade le fasarai tornâ dongje, chê che si je dissipade le fasarai, chê inmalade le fasarai dâ di ca; e o vuardarai chê grasse e tombolade. Lis passonarai come cu va.

Sul vuestri cont, pioris mêis, il Signôr, gno Diu, al dîs cussî: Viodêt! O judicarai fra une e chê altre, fra rocs e becs».

Peraule di Diu.

SALM RESPONSORIÂL

dal Salm 22

Inte messe di vuê, lis peraulis dal salm: Il Signôr al è il gno pastôr nus fasin pensâ a ce che al à dît Gjesù: Dait duncje a Cesar ce che al è di Cesar e a Diu ce che al è di Diu (Mt 22, 21). E s. Pauli al scrîf: Dait a ducj ce che a àn dirit di vê: la tasse a di chel ch'al à dirit te tasse, il rispiet a di chel che al à dirit al rispiet, l'onôr a di chel che al à dirit al onôr (cf. Rm 13, 6-7). Duncje il cristian al rispiete ducj, ma no si vendarà a nissun sorestant dal mont - a son ducj relatîfs - parcè che dome tu tu mi menis, Signôr, intal ream de vite.

R. Tu mi menis, Signôr, intal ream de vite

Se cjantât: Il cjant dai salms responsoriâi, p.84

Il Signôr al è il gno pastôr: no mi mancjarà nuie.

Mi fâs polsâ là che i passons a sverdein,

mi mene là ch'a son aghis frescjis.

Al tire sù la mê vite, in gracie dal so non

mi mene par trois di justizie. **R.**

Ancje s'ò ves di cjaminâ par une foranate scure,
di nissun mâl no varès pôre, parcè che tu mi sês dongje;
il to baston e la tô vuiscje
a son lôr che mi parin. **R.**

Tu prontis denant di me une taulade
presince dai miei nemîs,

il gno cjâf tu âs onzût di vuela
e il gno bocâl al è plen ch'al stranfe. **R.**

Propit, bontât e boncûr mi compagnaràn
ducj i dîs de mê vite,
te cjase dal Signôr
par une vore di agns o restarai. **R.**

SECONDE LETURE

1 Cor 15,20-26.28

Al consegnarà il ream a Diu Pari, par che Diu al sedi dut in ducj.

S. Pauli al tire vie culî un grant tendon e nus presente, tune magnifiche curnîs, il spettacul dai ultims tîmps.

La fin de storie no sarâ une tragedie, un sprofondâ tal abîs, tal nuie tal no-sens, parcè che: midiant di un om e je ancje la resurezion - ducj a saran fats vivi - Prime Crist - po, cuant che al tornarâ, chei di Crist -. L'ultin nemî a jessi ridusût a nuie e sarâ la muart - par che Diu al sedi dut in ducj. Culî o respirin un aiar al opost de filosofie dal nuie, nichiliste, tant di mode vuê.

Al sucêt propit cussî: tirât vie Diu al reste il nuie, intant che cun Diu ancje il nuie de muart al torne a vivi, e pe eternitât.

De prime letare di san Pauli apuestul ai Corints

Fradis, Crist al è stât resussitât dai muarts, primizie di chei ch'a duarmin. Parcè che, se midiant di un om e je vignude la muart, midiant di un om e je ancje la resurezion dai muarts; e come che ducj a muerin in Adam, cussî ducj a saran fats vivi in Crist. Par altri, ognidun tal so puest. Prime Crist, ch'al è la primizie; po, cuant che al tornarâ, chei di Crist; e po e sarâ la fin, cuant che al consegnarà il ream a Diu Pari, dopo di vê ridusût a nuie ogni principât, potestât e potence. Di fat al scuen regnâ fin che nol varâ metût ducj i siei nemîs sot dai siei pîts. L'ultin nemî a jessi ridusût a nuie e sarâ la muart. E cuant che dut al sarâ sotmetût, ancje lui, il Fi, al fassarâ at di sotmission denant di Chel che i à sotmetude ogni robe, par che Diu al sedi dut in ducj. Peraule di Diu.

CJANT AL VANZELI

cf. Ap 1,8;2,25

R. Aleluia, aleluia.

Jo o soi l'Alfa e l'Omega, chel ch'al è, ch'al jere e ch'al ven:
tignît salt il don de fede par cuant ch'o tornarai.

R. Aleluia.

VANZELI

Mt 25,31-46

Si sentarâ su la sô sente di glorie e ju dividerâ un dal altri.

I studiôs dûe Bibie nus visin che cheste e je une conte sapienziâl li che Gjesù nus fâs comprendi ce che al done sens e significât a la nestre vite. Culî Gjesù al ven presentât come un grant re d'Orient, circondât dai agnui e sentât sul trono de glorie, come che nus palese ancje la antifone di jentrade de messe: al merte di vê potence e ricjece, sapience...

Dome che il cristian al sa za che il trono de glorie di Crist in chest mont e je la torture de crôs, patide par amôr, fra doi delincuentis.

E je la crôs la glorie dal nestri Salvadôr e di li, di chê glorie e crôs lui nus dîs: o ai vude fan, sêt... o jeri pilgrin, crot, malât, in preson... Tu âstu viodût di me? Se tu âs vût cure, Vignît ca, benedets di gno Pari; se no tu âs vût cure: Lait lontans di me, maladets.

Al è chest, par cristians, mussulmans, agnostics e ateus, grancj e piçui, siôrs e puars, par ducj i popui, l'unic judici che la storie e Diu a fasaran sore di ognun di nô.

O concludin l'an liturgjic cjalant e valutant chest 2017 che al va a mont; ringraciant il Signor parce che, pal 2018, lui, tribulât fra i tribulâts, nus segne la puarte strete dal amôr che al sa patî pal prossim, la strade scomude, uniche, valide, sigure par jentra cun Crist a la vite (cf. Mt 7, 13-14).

Dal vanzeli seont Matieu

In chê volte, Gjesù al disè ai siei dissepui: «Cuant che il Fi dal om al vignarà te sô maiestât, compagnât di ducj i siei agnui, alore si sentarà su la sô sente di glorie e denant di lui a saran dadis dongje dutis lis nazions; lui ju dividerà un dal altri, come che il pastôr al divît lis pioris dai rocs, e al metarà lis pioris a la sô gjestre e i rocs invezit a la sô çampe. Alore il re ur disarà a di chei ch'a son a la sô gjestre: Vignît ca, benedets di gno Pari, a cjapâ paronance dal ream prontât par vualtris di cuant che al è stât fat il mont. Parcè che o ai vude fan e mi vês dât di mangjâ; o ai vude sêt e mi vês dât di bevi; o jeri pilgrin e mi vês sotetât, crot e mi vês vistût, malât e o vês viodût di me, o jeri in preson e o vês stât a cjatâmi. Alore i juscj i disaran: Signôr, cuant ti vino viodût plen di fan e ti vino dât di mangjâ, plen di sêt e ti vino dât di bevi? Cuant ti vino viodût pilgrin e ti vino sotetât? Crot e ti vino vistût? Cuant ti vino viodût malât o in preson e vino stât a viodi di te? E il re ur rispuindarà: Us al dîs in veretât: dut ce ch'o vês fat a un dai plui piçui di chescj miei fradis, mal vês fat a mi.

Po ur disarà a di chei ch'a son a la sô çampe: Lait lontans di me, maladets, tal fûc eterno, prontât pal diaul e pai siei seguaçs. Parcè che o ai vude fan e no mi vês dât di mangjâ, o ai vude sêt e no mi vês dât di bevi, o jeri pilgrin e no mi vês sotetât, crot e no mi vês vistût, o jeri malât e in preson e no vês stât a cjatâmi. Alore i rispuindaran ancje lôr disint: Signôr, cuant ti vino viodût plen di fan o di sêt, pilgrin o crot, malât o in preson e no vino viodût di te? Alore ur rispuindarà disint: Us al dîs in veretât: ce che no i vês fat a un di chescj plui piçui, no mal vês fat a mi. E chei chi si 'nt laran tal cjastic eterno, i juscj invezit a la vite eterne».

Peraule dal Signôr.

Si dîs O crôt.

Su lis ufiertis

Ti ufrin, Signôr, la vitime ch'e à riconciliât la gjernazie umane
e o prein cun umiltât che to Fi
ur dedi a ducj i popui i regâi de unitât e de pâs.
Lui ch'al vîf e al regne tai secui dai secui.

Antifone a la comunion

Sal 28,10-11

Si è sentât il Signôr re par simpri:
al benedissarà il so popul cu la pâs.

Daspò de comunion

Daspò di vê spartît il pan de immortalitât,
ti prein, Signôr,
di tignîsi in bon di ubidî ai comandaments di Crist, Re dal mont intîr,
par podê vivi par simpri cun lui tal ream dal cîl.
Lui ch'al vîf e al regne tai secui dai secui.

Riflession di pre Antoni Beline: **Re dai ultims**

La glesie e je lade preparantnus , domenie dopo domenie, ai grancj temis de fin: fin de vite, fin de storie, fin dal mont. E sun dut si viodeve la grande glorie di Crist, paron che al domande i conts di ce che nus à consegnât, nuviç che nus fasarà jentrâ te sale des gnocis, lari che nus puartarà vie dut ce che al è sogjet al timp e a la leç de vite di chenti.

Vuê, in cheste ultime domenie che te glesie di Aquilee si celebrave il misteri e la glorie de Trinitât...

Vanseli par un popul, an A, p. 220

* * *

Sante messe e Eucaristie, rîts, preieris, cjants: Hosanna pp. 34 - 119.

La creazione giubili, n. 5;

Lauda Jerusalem, n. 49;

Sit nomen Domini, n. 51;

Te lodiamo, Trinità, n. 169;

* * *

Crist îr e vuê

Principi e Fin

Alfa e Omega

Siei a son i tims

e i secui

A lui la glorie e la paronance

par dute l'eternitât dai secui.

Amen.

De

Vegle di Pasche

* * *

Lunis 27: **S. Valerian**, vescul di Aquilee dal an 370 av. al 387/388. Al presiedè il Concili des glesiis occidentâls convocât in Aquilee tal 381.

Om di grant valôr e dedicât cun dute la sô passion a la cure pastorâl.

Sabide 2 di Dicembar: **S. Cromazi**, sucessôr di Valerian (387-388) - 407/408. Sot di lui al florì in Aquilee un cenacul par coltâ e venerâ la fede

de glesie e une vore di oms, cognossûts pe lôr religjositât e sience, comprendûts Jeroni e Rufin, int cjaparin zovament.

* * *

* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*

* *Il cjant dai salms resposoriâi, Ed. Glesie Furlane, 2012.*

* *50 corâi de cristianitât todescje voltâts par furlan, ed. Glesie Furlane, 2016.*

* *Il libri des riflessions sul Vanzeli al è: pre Antoni Beline, Vanzeli par un popul, an A, Ed. Arti Grafiche Friulane.*

* *Par domandâ chescj libris scrivêt a info@glesiefurlane.org*

